

奏議

DS
751
L48A2
1705
V.6



李忠宣公文集

程泰覽

EAST ASIAN LIBRARY
UNIVERSITY OF TORONTO LIBRARY
130 St. George Street
8th FLOOR
TORONTO, CANADA M5S 1A5

宋李忠定公奏議選卷之十

明

皖桐左光先羅生



宋——李綱伯紀著

宗人李春熙皞如輯
筠州戴國士初士較

宗裔李嗣玄評定

謝復觀文殿大學士表

紹興五年

臣綱言、伏奉告命、復臣觀文殿大學士、依前左銀青光祿大夫、提舉西京嵩山崇福宮、臣已望闕謝恩、祇受者、禋祀合宮、精意格于上下、錫福寰海、湛恩浹於臣民、致茲臯戾之餘、亦預甄收之列、以榮爲懼、旣感

且慙

謝中

伏念臣造道弗優、賦材甚陋、值國家之艱棘、

躡英俊以驅馳、當聖主龍飛之初、誤蒙首舉、任大臣
棟隆之責、其敢雷同、惟信古太過、而欲爲曲突徙薪
之謀、故與物多違、而每致跋扈、胡薨尾之患、奉身以退、
何補朝廷、任道而行、有同醉夢、念一違於軒陛、忽九
換於星霜、適魍魎喜過之鄉、自貽伊戚、免蛟鰐垂涎
之口、難報此恩、恍然若脫兔之投林、老矣嗟病牛之
臥墮、竊真祠之厚祿、已負素餐、極祕殿之華資、更慙
非據、叨膺寵渥、朶積凌兢、此蓋伏遇皇帝陛下、體道
之公、以慈爲寶、陟降無私、於好惡、體貌不替、於初終、

釐事告成、欲均敷於有衆、皇恩廣被、遂濫及於陳人、
臣敢不益堅葵藿之心、期保桑榆之節、望鴛鴦之清
切、莫陪北闕之班、奉香火之精懃、願祝南山之壽、臣
無任瞻天仰聖、戰越惶悚之至、

親筆詔書

朕昨總戎車、前臨敵壘、洎潛師之引遁、勞戍役以
言旋、惕若耿躬、懼茲多難、聿求善後之計、敢蹈護
前之非、博訪舊臣、屢形深詔、卿首陳三策、適投却
敵之機、繼上六條、大闡興邦之畧、意拳拳而曲折、
言凜凜而高明、有發予衷、如對卿語、此乃卿精忠

許國誠節表時、雖在燕閒之中、不忘開濟之事、肆
披風蘊、因致良規、省閱再三、嘉歎不已、至若議和
避地之失、練兵積粟之方、將議改圖、共期底績、臨
朝願治、顧策慮之是資、當饋思賢、念話言之可想、
宜從疾置、時告嘉猷、終藉經綸之才、助成戡定之
烈、故茲親筆、以示至懷、賜李綱、

謝親筆表

臣綱言、今月十七日、承御前金字牌、降到親筆詔書
一道、臣已望闕謝恩、祇受訖者、燕辭冒貢、方虞蕭斧
之誅、宸翰載頒、乃膺華袞之寵、燦爛奎壁之畫、昭回

雲漢之章、節屋生輝、臣鄰改觀、

謝中

竊以人臣之言、不

激切不足以動人主之聽、而激切則有逆鱗之愆、人主之聽、不廣大不足以盡人臣之言、而廣大則有盈庭之咎、辭順理直、而匪訐者言之善、博詢精攷、而不惑者聽之公、自古所難、於今乃見、皇帝陛下、悼戎壘之弗靖、慨國步之多艱、欲成捍禦強敵之圖、故有諮諏舊臣之令、而臣夙叨殊獎、嘗忝近司、清問下詢、雖頗殫於千慮、空言上達、曾何補於萬分、誤蒙睿慈、親洒宸筆、褒以精忠之目、許之時告以言、鳳翥鸞翔、筆勢妙追於古蹟、風飛雷厲、訓辭感動於人心、顧臣何

人當此異數、鄧禹被光武之親詔、李靖奉太宗之手
書、如臣所蒙、視古無愧、刻之琬琰、著聖君與善之誠、
傳之雲來、見愚臣許國之志、此蓋伏遇皇帝陛下、成
能天縱、盛德日躋、招徠俊傑之謀、協濟興王之運、禮
從微始、濫居辛毅之先、仁不遐遺、曲啟簪履之舊、致
茲榮耀、驟及凡庸、臣敢不仰體眷懷、益堅素守、衰慙
定遠、難致玉關之功、老比營平、願上金城之畧、報恩
有路、矢死爲期、

從來雖有蕭斧之說、然無意義、蕭斧當作齋
斧、古者遣將具斧鉞齋於太廟而後遣之、所
以重將帥之任也、
李又玄評

謝親筆劄子

臣綱、今月十七日、承御前金字牌、降到親筆詔書一
道、臣已望闕謝恩、祇受訖、跪讀聖訓、仰戴天恩、涕泗
橫流、精爽飛越、竊念臣賦性樸鄙、初無寸長、誤被特
達之知、首膺考爰之選、待遇之禮、超軼等倫、犬馬微
誠、敢忘自效、而臣許國之忠、雖切、防患之術、實疎、拙
於謀身、與物多牾、乞骸罷政、誣謗並興、流言飛文、汙
浼天聽、負憂抱釁、不敢自明、陛下察其心於群口、鑠
金之際、薄其罪於衆人、欲殺之時、始終保全、使得視
聽食息、以至今日、肉骨之恩、盡出鴻造、永惟天地父

母之德、非臣殞首捐軀、所能報稱、昨自去冬、狂虜犯
順、戎輅親征、海寓之情、同深憤激、而臣不量淺短、輒
以已見、陳防捍賊馬便宜利害、以聞、伏蒙詔書、特加
獎諭、迨至今春、虜騎旣遁、又奉詔旨、令臣條具攻戰
守備措置、綏懷、所以爲善後之策者、來上、臣感荷大
恩、殫竭愚慮、敢以區區管見、冒瀆天聰、議論迂疎、文
辭拙直、大懼不足以裨廟筭之萬一、今者乃蒙聖慈、
親洒宸翰、曲賜褒稱、旣目之以精忠、又許之以時告、
不遺簪履之意、溢于訓辭、顧臣何人、可以當此銘鏤、
肌骨矢死不忘、昔唐權德輿、嘗讀太宗賜李靖手詔、

至流涕曰、君臣之際、乃爾邪、如臣所蒙、於靖何愧、顧臣竢然衰病、未知圖報之所、惟當十襲祕藏、刻之金石、傳示雲來、使天下後世、知聖君不忘舊臣、樂取諸人以爲善者如此、臣已奉表稱謝外、謹齋沐親書劄子、冒塵聽覽、臣不勝感恩惶懼戰越之至、

親筆詔諭

紹興五年十月起公安撫江西公先有辭免二疏故高宗以手詔起之

朕以大江之西、俗輕而悍、弄兵之寇、無歲無之、師旅荐興、民益凋瘵、肆圖舊弼、往鎮臨之、卿威名德望、聳動一時、風采想聞、人自懾服、起于閒館、作我价藩、匪惟指顧之間、一變潢池之習、先聲所暨、諒

折遐衝、朕之用卿審矣、卿宜以安社稷爲已任、勿
間中外、勉爲朕行、不必數有請也、故茲親筆詔諭、
卿其悉之、

辭免第三奏狀

右臣、近准尚書省劄子、備奉聖旨、以臣辭免新除江
南西路安撫制置大使、兼知洪州、不允所乞、臣已再
具奏辭免、未奉回降指揮、今月二十二日、承御前金
字牌、降到親筆詔諭、勉臣使行、不必數有所請、臣不
勝感恩荷德、惶懼激切之至、伏念臣學術空疎、才能
迂拙、嘗誤蒙於器使、初不閱於歲時、建炎承乏宰司、

者僅七旬、紹興將命荆廣者纔數月、迄無善狀、仰報
明恩、豈徒一譽而一非、固已再奮而再躡、自知淺薄、
姑務退藏、跡異羲之、雖微誓墓、志同仲子、但欲灌園、
豈謂皇帝陛下、曲軫深慈、眷憐舊物、起自閑廢之地、
付以方面之權、親洒宸章、臨責丘壑、隆恩厚德、超度
等倫、瑣質庸材、益難報稱、而臣衆毀所集、憂患異於
他人、多病交攻、精力愆於往日、經霜之葉、望風而先
零、傷弓之禽、聞弦而亟墮、畏首尾而身之餘者有幾、
懼萋斐而心之慮者益深、惟險阻艱難之備嘗、宜恐
惕驚危之獨至、使膺委任、必致顛隳、與其異時蒙曠

職之誅、曷若今日被固辭之責、力祈矜允、不避再三、
伏望皇帝陛下、洞照忱辭、無嫌反汗、使安閒散、深庇
孤蹤、至於在畎畝而愛君、伏嵯巘而憂世、此則微臣
之素志、豈以進退而異心、閑寂之中、思慮有得、自當
獻進於君父、庶幾圖報於涓埃、干冒天威、俯伏俟罪、

辭免劄子

臣綱、伏蒙聖慈、付臣以江西一路重寄、臣以憂患之
餘、早衰多病、再具奏辭免、乞寢成命、未奉俞允、今月
二十二日、承御前金字牌、降到親筆詔諭、賜臣德意
之隆、訓辭之渥、非臣愚陋之所宜蒙、臣不勝感激惶

懼之至、伏念臣久荷國恩、誤被驅策、備嘗艱險、屢蹈
危機、仇怨滿前、得謗特甚、皆緣國事、豈有他哉、一昨
靖康間、金寇犯闕、臣竊謂朝廷軍政不修、故使夷狄
敢肆陵侮、當治兵爲自疆之計、然後和約可成、而主
和議者、一切苟且目前、不爲宗社生靈長久之策、謂
臣異議、遂成怨仇、至建炎初、遭遇陛下、龍飛首蒙擢
用、寘之宰司、是時僞楚張邦昌、以太保同安郡王、領
尚書省、臣竊謂邦昌已嘗僭竊位號、豈可參與朝政、
使四方解體、上疏乞正其罪、聖意開納、邦昌謫授散
官、安置、僞命臣寮等第行遣、而受僞命者、復成怨仇、

二怨合力致死於臣、巧詆厚誣、靡所不至、加以危蹤寡與、忌嫉者多、徒抱孤忠、不能自達、今者陛下察臣於積毀顛沛之中、起臣於遠屏閑廢之地、宸章奎畫、光賁山林、聖德厚矣、而臣久冒風波之險、實懷憂畏之心、啓處不遑、進退維谷、藉使臣力疾承命、黽勉效官、遇事蓄縮、無以自見、豈不仰負陛下委任之意哉、所以不避斧鉞之誅、累奏力辭者、非獨以犬馬之齒已衰、負薪之病方甚之故也、伏望聖慈哀憐、更加睿察、許臣少安閑散、保全晚節、使仇怨者無以中傷、則臣感戴天地父母之恩、隕首捐軀、何足論報、臣已三

具奏辭免外、謹齋沐親書劄子、干冒天聰、伏俟嚴譴、

和議之誤國彰彰矣、而受邦昌僞命之臣、雖至愚者、猶知惡之、乃竟以二怨交攻、使公孤忠莫達甚矣、闇主之不足與有爲也、

李又玄評

謝親筆詔諭表

臣綱言、伏蒙聖慈、以臣具奏辭免江南西路安撫制置大使、兼知洪州恩命、特降親筆詔諭、臣已望闕謝恩、祇受告命訖者、忱辭冒貢、仰祈從欲之仁、宸筆載頒、誤被非常之寵、天語丁寧而溫厚、雲章燦爛而昭回、久抱負薪之憂、有稽嚴命、莫遂循牆之請、徒切覲顏、中謝伏念臣奮自書生、幸遭休運、當聖主龍飛之日、

寔中興草昧之初、博選時髦、首冠台輔、外拒憑陵之
醜、虜粗定規摹、內排僭僞之邪朋、稍伸典憲、荷知其
臆、圖報未能、責重憂深、果自貽於顛覆、才疎意廣、終
何補於涓埃、賴皇明之燭幽、脫讒波於濱死、美名峻
秩、盡復青氈、三徑一廛、已甘白首、敢意睿明之求舊、
加憐孤陋之授閑、起自山林、付以方面、親御翰墨、發
爲奎璧之文、光賁臣鄰、增重藩屏之勢、恩輝若此、報
稱謂何、此蓋伏遇皇帝陛下、清明在躬、憂勤圖治、念
股肱之郡、聿求共治之良、采葑菲之材、不以下體、而
棄誕敷大訓、式遙其行、用人無中外之殊、實繫鴻造、

自任以社稷之重其可易當臣敢不佩服深慈激昂
晚節謹奉法而循令庶宣化而承流成象可觀幸仰
窺於義畫上章請覲願親奉於堯言

論金人失信劄子

紹興六年二月召赴行在面
對訖赴江西任

臣竊觀金人自宣和靖康以來憑陵中國其所以爲
起兵之辭者不過以失信二字加於中國而已文檄
之中動輒及此而中國之士大夫與夫兵民將士不
察其故亦自以爲失信於夷狄而致此擾攘也語之
則愧耻而扼腕用之則望風而奔潰職此之繇殊不
知失信在金人而不在中國彼方恃虎狼之威假信

一破的忠
臣之言

義之說以責我。吾之人謀回遁。方震怖之不暇。豈敢與之爭是非曲直哉。徒受失信之名。使士大夫與夫將士兵民。茫然不知所仗。此不可以不辯也。臣請爲陛下詳言之。方宣和間。遣使與金人結約海上。同謀契丹。厚與之賂。而得燕雲之地。以爲失信於契丹。則可以爲失信於金人。則不可。其後金人敗盟。以陷燕山。遂犯京城。此則金人之失信一也。虜騎犯闕。勤王之師未集。人情震駭。主和議者。不爲久長之計。一切有不可許者。許之。結成禍根。至今爲梗。然當時所許。乃城下之盟。神所弗聽。元約肅王至河而反。不肆侵

掠、而金人挾肅王以渡河、虜掠子女玉帛、殺戮尤甚。
恭罕復陷威勝、隆德等州、淵聖嘗降詔書、謂金人渝
盟、必不可守、此則金人失信者二也。朝廷遣使交割
三鎮、而三鎮之民、守死不從、此特中國之人、不願淪
於夷狄耳。淵聖奉書請增歲幣、以代三鎮租賦、金人
挾此、遂有再入之舉。朝廷遣執政郎官、分行割地、奉
使虜中、徃徃爲兩河之民所殺。如聶山王雲之流、是
也。繇是觀之、三鎮之民、朝廷豈能令之哉。虜騎旣破
汴都、登城不下、猶假和約已成之說、以款勤王之師。
遂遷二聖、卷六宮而北之。策立逆臣、易姓建號、此則

金人失信者三也。金人負大失信者三、反以此名加於中國、以爲起兵之辭、正猶盜賊刼掠主人、恃其凶威、靡所不至、而猶自以爲已之直、而主人之曲也。小人橫逆、君子猶以禽獸蓄之、況夫夷狄強暴、中國豈可以信義與之較曲直哉。然臣聞師直爲壯、曲爲老、興師動衆、奉辭伐罪、以直爲先、願陛下降臣此章、與大臣熟議、發德音、下明詔、詳述自宣和靖康以來、失信在彼、而不在此、使中外士大夫、與夫將士、兵民、周知其故、曉然不疑、庶幾在我有辭、人百其勇、士氣日振、戡亂定功、莫此爲先。伏惟陛下留神幸察。

直壯曲老韜鈴家能言之志爲氣帥不慊則
餒非韜鈴家所深知也 李又玄評

論襄陽形勝劄子

臣竊以當今天下形勝在襄陽何以言之四方地勢
正猶碁局今車駕駐蹕於吳越、是置子於東南隅也
宣撫制置司聚兵於川陝、是置子於西北隅也、湖湘
屯重兵以控制、是置子於西南隅也、吳越繇湖湘以
趨川陝、如行曲尺之上、相去萬有餘里、號令未易達
首尾不相應、一有緩急、何以爲援、惟襄陽地接中原
西通川陝、東引吳越、如行於弓弦之上、地里省半、而
又前臨京畿、密邇故都、後負歸峽、蔽障上流、遣大帥

率師以鎮之如置子於局心真所謂欲近四旁莫如中央者也。旣逼僭僞巢穴賊有忌憚必不敢窺伺東南。將來王師大舉收京東西及陝西五路又不敢出兵應援。則是以一路之兵禁其四出。因利乘便進取京師。乃扼其喉拊其背制其死命之策也。朝廷近拜岳飛爲荆襄招討使其計得矣。然駐軍岳鄂未聞前進。豈不以自兵火以來襄陽焚毀尤甚野無耕農市無販商城郭隳廢邑屋蕩盡而糧餉難於運漕故耶。臣觀自古有意於爲國家立功名之人如劉琨祖逖之徒未嘗不據形勝廣招納披荆榛立官府履艱險。

攻苦淡。積日累月。葺理家計。然後能成功者。若欲坐待其自成。必無此理。願詔岳飛先遣將佐軍馬及幕府官徑趨襄陽。隨宜料理。修城壁。建邑屋。招納西北之民。措置營田。勸誘商賈之伍。懋通貨賄。稍稍就緒。然後徙大兵以居之。旁近諸郡如金房隨郢見屬我者。可以撫綏。如陳蔡許潁見從賊者。可以攻取。不過年歲間。必有顯效。如謂屯兵聚糧。運漕爲難。則漢江出襄陽城下。通於沔鄂。漕運之利。未有如此之便者。當以兵護糧舡。使賊不得抄掠。則吾事濟矣。今日天下形勝。臣愚以謂無出襄陽之右者。伏望聖慈。特加

睿察早降指揮、無使緩不及事、天下幸甚、

公嘗論天下形勝以關中爲上、襄鄧次之、今以襄陽爲上者、以兩河旣失、因時制宜也、

論和戰劄子

臣聞戰國之際、合從連橫、皆其國安危存亡之所係、而當時六國之君、不能深計利害、以聽其說、從人憑軼、結駟、說以合從之謀、則曰謹奉社稷以從、橫人憑軼、結駟、說以連橫之說、則又曰謹奉社稷以從、是其胷次初無一定之計、而爲群言之所眩惑、宜其無成功而卒至於敗亡也。夫合燕趙韓魏齊楚之師、協謀併力、以拒秦、此六國之利、故從約旣成、投書函谷關。

而秦師不敢出閬者十有餘年。豈非計之得耶。其後秦遣橫人游說以欺六國之君。於是從散約解。爭割地以賂秦。秦有餘力以蠶食天下。而六國遂以不振。繇是言之。爲六國計。從說是也。橫說非也。今之所謂和戰者。何以異此。古者隣國交好。則有和親。聘問往來。休息兵革。災患相卹。慶賀相從。夫是之謂和。金人不然。假和議以行其詐謀。割地取賂。旣已約和。則又求釁以戰。以此亾契丹。而困中國。中國爲和所誤者多矣。十餘年來。持和議之說。一切苟且。希冀萬一者。何其紛紛也。夫靖康之間。彼以敵國待我。尚可言和。

至建炎以來。見於文檄。彼其待我者爲如何。乃欲恃
和議以爲自安之計。其可乎。況仇讐之邦。不共戴天。
卑辭重幣。祇自取辱。何益於事。惟當修政刑。明賞罰。
選將帥。治軍旅。備器械。利甲兵。峙糗糧。積財用。士氣
旣振。乘機大舉。以恢復中原。惟戰可成。中興之業。猶
合從以拒秦。不可易之理也。然兵凶器。戰危事。雖孔
子未嘗不慎。故曰臨事而懼。好謀而成。其可易言哉。
知彼知己。乃可以戰。我實而彼虛。我堅而彼脆。我治
而彼亂。在我者有一定之規模。有應變之方畧。有輯
睦之將帥。有精練之士馬。有蓄積之財用。穀粟。而又

敵人有間隙可乘之機會。然後可以決勝於千里之外。宗社安危所係。不可忽也。今日爲吾患者。不在劉豫而在金人。軍政旣修。欲議恢復。正當慮始。慮卒。預圖善後之策。得某地當屯某兵。用某人可守某地。新附之衆如何撫綏。將來之事如何指畫。使金人來援劉豫。當如何以待之。此數事者。皆有定議。則中興之功。已在吾掌握中矣。夫勝負兵家常勢。大計已定。願無以細故動搖。益務自治自彊。如漢高祖之堅忍。乃可得志。儻或且戰且和。如六國之朝從而暮橫。臣愚未見其可也。伏望聖慈。留神幸察。

金人每勝必和既和則又求釁以戰二十年
來以此亡契丹困中國而終莫之悟但不能
欺明眼人如忠定者耳
以戰國之從橫譬當時之和戰極確宋人讀
戰國策亦咲連衡之愚而且戰且和卒無定
計者不能堅忍而爲細故所搖也 又玄評

論財用劄子

臣竊見自宰臣以下裁減俸祿有以見朝廷財用之
闕也陛下臨御以來恭儉憂勤無燕遊玩好之娛六
宮減省無橫恩濫賜之費執政常虛侍從多闕省臺
寺監之官未嘗具員而財用闕乏乃至此者豈非以
養兵之費不貲故耶臣竊觀近年行在禁衛之兵與
夫諸將屯兵於大江表裏不啻數十萬人日有食錢

月有俸料、時有激賞犒設、凡數倍於承平無事之時、而戶部歲入常賦、無承平三分之一、朝廷所資摧貨、亦頗有入納、不如平時之數者、然則積月累歲、帑藏遂虛、無足恠者、戶部調度不足、則仰給於朝廷、朝廷支降不繼、則責辦於州縣、雖陛下屢降寬恤之詔、不許歛取於民、然勢有不得已者、非取於民、曷從而得、降官告給度牒、理積欠、賣戶帖、名雖不同、取於民一也、方今民力凋弊、取之不已、物力耗屈、人心驚疑、非長慮却顧之策、易曰、何以聚人曰財、理財正辭、禁民爲非曰義、財非義不理、興師動衆、奉辭伐罪、非財不

行、今陛下張皇六師、恢復疆土、以建中興之業、而財
用不足、將何以克濟大功、昔太公佐周、而立九府之
法、管仲相齊、而明取予之權、范蠡霸越、而用計然之
策、蕭何輔漢、而專轉輸之事、近世有唐、自天寶而後、
兵革不解、肅代德宗之朝、有劉晏韓滉之流、皆通於
財計、權百貨之低昂、籠天下利、以佐軍興、不歛於民、
而國用足、載在方冊、其術可考、臣愚伏望聖慈、降旨、
朝廷委官、考劉晏韓滉事跡、可行於今者、條具進呈、
試採其說、擇有心計、疏通公廉之臣、而推行之、庶有
補國用、於戶部常賦、朝廷權貨外、別項封樁、專以養

兵而佐中興、伏惟陛下裁幸、

論營田劄子

臣竊見朝廷近來措置營田諸路帥臣、皆帶使名以
摠治之、可謂得策、然今日之事、莫利於營田、亦莫難
於營田、何哉、耕闢疆土、教之稼穡、足食足兵、且耕且
戰、此所以莫利於營田也、開荒懇廢、必有其人、若籍
民力、則淮南兵革、江湖旱災之餘、民力凋弊、田疇荒
蕪、況欲率之以事新田、力必不給、若用兵伍、則諸軍
久習驕惰、但知開口仰食、乃欲驅之、使從事於南畝、
勢必不能、而又牛具穀種、農家所須、皆不可闕、勸懲

勤怠督視耕穫、必須親臨、取予有術、其利猶在數年
之後、此所以莫難於營田也、臣愚謂宜令淮南襄漢
宣撫招討使、各置招納司、以招納京東西河北之民、
明出文牒、厚加撫循、有來歸者、撥田土、給牛具、貸種
糧、使之耕鑿、許江湖諸路、於地狹人稠路分、自行招
誘、而軍中人兵願耕者、聽其請佃、則人力可用矣、初
年租課盡畀佃戶、方耕種時、仍以錢糧給之、秋成之
後、官爲糴買、次年始收其三分之一、二年之後、乃取
其半、罷給錢糧、則所謂知予之爲取、政之寶也、凡此
數者、皆措置之大槩、其詳須畫一條具、立爲成法、乃

爲長久之計不然徒有營田之名何補於事伏望聖
慈特降睿旨下臣此章令諸路營田使司各具利害
申朝廷斟酌其宜而推行之庶幾有助養兵之費不
勝幸甚

忠定公營田之說能行于紹興則足以禦金
人董崇相營田之功不罷于天啓則無憂乎
奴虜良法已行美利已見又群囂而旁掣之
階厲爲梗自昔已然 李又玄評

論虔州盜賊劄子

臣契勘本路虔吉二州民素强悍、徂於爲盜、結集兇
黨、動以萬數、千百爲群、頭項不一、出沒江西廣東福
建數路作過、雖朝廷節次遣兵、或招或捕、至今徒黨

依舊猖獗、全未平殄、多於虔州管下諸縣、擇要害地、
建置寨柵、蜂屯蟻聚、窺伺間隙、攻陷州縣、殺戮生靈、
擄掠財物、爲害不細、一路官兵進討、則散入他路、諸
路官兵進討、則深入巢穴、依負險阻、卒難討蕩、官軍
旣退、則復出爲惡、習以爲常、而又諸路軍馬、無所統
一、乍前乍却、心力不齊、非設方畧、使諸路之兵、節制
歸一、難以成功、伏望聖慈、特降睿旨、令江西廣東福
建三路軍馬、一處節制、諸路各應副錢糧、江西兵屯
虔吉州、廣東兵屯循梅州、福建兵屯汀州、禁其出沒
抄掠、因利乘便、會合掩擊、討蕩巢穴、勦殄積年逋誅

之寇或因兵力招撫出降、以次酋首并強壯人充軍、前使喚使數路良民早得奠居、不勝幸甚、

國朝於虔州置節鎮正與公意合但節鎮難其人耳 李又玄評

論福建海寇劄子

臣契勘廣南福建路近年多有海寇作過、劫掠沿海縣鎮鄉村、及外國海船、市舶司上供寶貨所得動以巨萬計、官司不能討捕、多是招安、重得官爵、小民歆艷、皆有倣倣之意、臣恐自此爲患未艾、蓋緣兩路帥司並無戰艦水軍、遇有海寇、坐視猖獗、不能進討、止是於沿海擺布些小兵卒、爲保守之計、賊船來去、近

遠不常、並海之民、罹其荼毒、擄掠船舶、旣多、愚民嗜
利喜亂、從之者衆、將浸成大患、如晉之孫恩、不可不
過爲之備、伏望聖慈、特降睿旨、常存兵於兩路鎮壓、
仍下逐路帥司、委以措置戰艦、招集水軍水夫、常切
教閱、令士卒習於風濤之險、以水夫駕舟、以官軍施
放弓弩火藥、雖賊櫂飄忽、可以追逐、掩擊殄滅、一兩
頭項、則餘人有所忌憚、不敢覬覦妄作、庶幾海邦之
民、得被朝廷大賜、不勝幸甚、

以作賊得官嗜利喜亂之徒、其歆艷固宜、此
今日招安盜賊之明鑒也、必威足以聳、使惧
而自歸、恩足以懷、不挺而走險、于武震庶毋
頃乎、

李又玄評

論常平劄子

臣聞火旱金穰、天有常數、雖堯湯不能無水旱、而能不爲水旱所困者、人事修而蓄積備也。傳曰、國無九年之蓄曰不足、無三年之蓄曰國非其國。况年歲之儲、尚有關乎、祖宗常平之政、寔用古制、豐年則增價以糴、不使傷農、凶年則損價以糴、不使艱食、倉廩有蓄、而民無饑困之患、勅令備具、禁制嚴密、誠良法也。建炎以來、罷提舉官、而以茶鹽司兼之、奉法不謹、浸以隳壞、常居諸色錢物、州縣剋移、朝廷剗削、所餘無幾、豐年粒米狼戾、則無錢以糴、凶年民有饑色、則無

米以糴、法存而人不舉、可勝歎哉、去歲之旱、繇亘數路、江湖爲甚、而福建廣南次之、官吏坐視民之流移、而無以賑貸、則常平之政、不修之過也、臣愚伏望聖慈、特降睿旨、改提舉茶塩官、爲提舉常平茶塩等事、勿使視之爲兼職、恬不加恤、責其遵奉法令、不得少有違戾、自今州縣、不得那移、朝廷不復剗削、依舊推行糴糴之政、敢有違戾、重寘典憲、庶幾良法復舉、民受其賜、天下幸甚、

議迎還兩宮劄子

臣伏覩陛下、近降親筆詔書、念道君太上皇帝、孝慈

淵聖皇帝鑾輿未還、久因沙漠、陛下欲盡爲人子爲人弟之道、而未可得、辭旨懇惻、讀之者爲流涕、臣竊仰陛下孝弟之至、通於神明、思慕之極、見於羹牆、誠意格天、天必從之、兩宮雖遠、安知無可還之理、然議者或謂二聖還、則難於所處、臣竊以爲不然、昔漢高祖既定天下、太公猶存、高祖曰、定天下者我也、故太公稱太上皇、韓安國援此以說梁孝王、使知帝王無私天下、至公之道、萬世之訓也、方宣和末、金寇犯闕、道君不能禦、而遜位淵聖、及靖康末、金寇再來、淵聖不能保、而遠狩絕域、僭僞之臣、易姓建號、宗社顛危、

天下反覆。賴陛下揔師于外。億兆推戴。受天眷命。入繼大統。守宗廟社稷。爲神明萬物之主。迨今十年。國勢粗定。此陛下之功也。況將恢復區宇。翦屠鯨鯢。使中國再安。二聖旋軫。爲宗社無疆之休哉。正當盡爲人子爲人弟之道。問安視膳。先意承志。極四海之奉。致天下之養。使薄海內外。歌詠歎仰。而垂裕無窮。豈不韙歟。臣聞至誠感神。惟德動天。無遠弗届。舜往于田。號泣于旻天。于父母。自古帝王。稱爲達孝。無如帝舜者。臣願陛下。夙興夜寐。齋明盛服。禱于上下神示。惟以二聖早還爲祈。朝以聽政。晝以訪問。夕以修令。

揔覽萬機。惟以何施何爲。可以還二聖爲念。則神明之所協机。必有合天人之願者矣。昔申包胥聞伍員有亾楚之言。則曰我必存之。其後哭於秦廷。以乞師。果復楚國。狄仁傑語武后之事於荆南江中。其後卒復唐嗣。垂祚三百。匹夫之志。其烈如此。況於陛下履帝王之位。躬孝悌之德。欲救父兄於漠北苦寒之鄉。天地神人。其所佑助。宜如何哉。昔太公爲楚軍所獲。高祖兵振。太公乃歸。陛下誠能爲自治自強之計。國勢日隆。臣將見如侯生之流。緩頰往說。迎還兩宮。仰副陛下之盛德。必不乏人矣。臣以愚憊。干冒天威。不

勝戰越取進止

二帝之還不在朝祈夕請而在所施所爲漢高兵振而太公自歸其明驗也于肅愍深得此意

晉惠公爲秦所執使人歸告卻呂曰孤雖歸辱社稷矣其卜貳圖也繇此觀之卽淵聖歸亦不難于所處矣此古今不易之理也

辯余堵事劄子

臣伏見靖康間、結約余堵事、近年朝廷士大夫、不深知其故、徃徃追咎、以爲失策、又以其事爲專出於臣、此所謂見影而吠聲者也、臣請論之、余堵者、耶律氏之尊屬也、實掌契丹兵柄、天祚失德、人心離叛、余堵欲立其子、所謂晉王者、以靖國人未果、而女真之變

作、余堵將兵于外以禦之、其謀頗泄、天祚誅晉王及其母、余堵聞之、不敢歸國、遂從女真、方粘罕之圖太原也、余堵在其軍中、因使者蕭倫等來、使達意於中國、欲援立耶律氏、且爲內應、是時邢侗、張撝、館伴得其言、奏聞淵聖、宣諭宰執、僉謂國家自澶淵以來、與契丹盟好、百有餘年、兩國生靈皆受其賜、古所未有、一旦見利敗盟、遂有金人之禍、非援立耶律氏、以合天心、禍難未已、且謂使謀雖泄、亦無甚害、正欲間之、使燕人德我、而金人疑燕、如高祖使陳平間楚之義、淵聖以爲然、得旨、令宰執召使人會議、翌日宰相徐

慶仁、吳敏、知樞密院事、臣綱、門下侍郎耿南仲、中書侍郎唐恪、尚書右丞何臬、同知樞密院事許翰、皆聚於都堂、召使人蕭倫等、并館伴官邢倞、張撝、河東轉運使張灝、皆使與議、詢其說、與邢倞、張撝所奏之說合、宰執因以朝廷之旨諭之、以荅其意、是時雖屏堂吏、而與議者衆、其言頗泄、於外、士大夫多知之、其後臣被命宣撫兩河、得淵聖親筆、令援立契丹、招納李嗣本等、軍前以蠟書結燕人者甚多、屬官詹大和主之、皆得其要約、何獨余堵哉、未幾徐慶仁、吳敏罷、而相唐恪、朝廷之論中變、臣亦以疾丐歸、其事遂寢、今

唐大和猶存、可召問也、靖康之末、言者乃以余堵之事、歸罪於臣、士大夫不知本末、從而和之、因敵制謀、結約離間、此兵家之常事、昔高祖與項籍爭天下、則遣隋何、說其諸將、使背楚而歸漢、仁宗欲制西夏、則遣种諤、間其族用事酋首、後皆得志、竒謀祕計、顧所以用之者如何耳、今朝廷方合衆智、屈群策、制敵國、以圖大功、計謀未可廢也、臣恐議者猶援余堵以爲言、使智慮之士、懲創畏縮、不敢盡其謀畫、非計之得、伏望聖慈、與大臣熟議、凡獻策者、察其事宜、如可採用、一切推行、後有顯效、優加旌賞、庶幾協謀併力、可用。

爲中興之助取進止、

宋李忠定公奏議選卷之十一

明

皖桐左光先

 羅生選

宗人李春熙

 如輯

宋 李綱伯紀著

宗裔李嗣玄評定

宗後學李榮芳重訂


謝賜玉鶻馬表

臣綱言、伏蒙聖慈、特降中使、賜臣玉鶻馬一匹、臣已
祇受訖、天庭入覲、慙非季子之歸、御廐呈材、濫受康
侯之錫、寵踰其分、愧溢于懷、謝中竊以晉文多修扞之
功、乃被周王之賜、子儀有戡定之烈、是膺唐帝之恩、

顧臣何人、亦與茲數、去軒墀而戀寵、昇牧圉而增榮、
秀骨蘭筋、騰驤磊落、殊形逸態、倜儻權奇、鍾流雲飛、
電之姿、有超山跨谷之足、宜膺駕御、節以和鸞、以昇
瑣材、實謂非稱、此蓋伏遇皇帝陛下、法天臨下、以道
觀能、起臣於閑廢之中、賜臣以清燕之對、禮加三接、
恩解左驂、憫其驅馳之勞、予以安閑之乘、而臣衰頹
已老、結約亾奇、修我戈矛、莫豫宣威於沙漠、歸于丘
壑、終期解縱於渭濱。

論進兵劄子

臣近者、伏蒙聖恩、許令入覲、特御內殿、三賜引對、疎

遠之跡、得望清光於咫尺間、從容移時、仰聆玉音、俯竭愚悃、臣子之情、不勝欣幸、然進對之久、恐勞聖躬、加以言詞拙訥、敷奏迂疎、猶有未能盡其底蘊者、敢昧死以聞、臣本書生、初不知兵、自靖康以來、竊見朝廷軍政不修、致有  之禍、夙夜以思、欲振起中興之業、爲自治自疆之計、非兵不可、昔蘇軾當熙寧元豐間著論、深戒用兵、使軾生於今日、則必以兵爲先務、何則、所遇之時異也、然兵家多故、千緒萬端、有奇有正、變通無方、能讀其父書者、未必能施於行事、不讀古兵法者、未必不暗合、孫吳顧所以用之者如何

耳。臣嘗推原古人用兵之意。比較今日主兵者之失。大畧有四。夫兵貴精不貴多。多而不精。反以爲累。故昔之善用兵者。料簡至精。率能以少擊衆。如于將鏖。鄒迎刃而斷。莫之敢撓。其與頑鐵。豈可同年而語哉。王邑百萬而破於光武之三千。符堅百萬而敗於謝玄之偏師。用此道也。又況將兵如將將。多多益辦。唯韓信能之。自餘各有分量。今之諸將。貪多務得。見他人之兵。則垂涎以務并吞。初不自量其智力。果能節制運動。如身之使臂。臂之使指乎否也。冗食旣多。坐耗國用。疲劣弗簡。遇敵先奔。一大將連十數萬之衆。

文法亦
自變換

未聞有敢深入而建奇功者。此不務精而務多之過也。將貴謀不貴勇。勇而不謀。適爲敗擒。故昔之善將兵者。或深謀於己。或廣謀於人。韓信背水而陣。示以大將旗鼓。使敵趨利。拔趙幟而奪其城。遂以破趙。將士皆莫能知。此深謀於己也。得李左車。西向而師。事之。遂傳檄而定冀齊。此廣謀於人也。周亞夫亦然。其謀於己。則堅壁不戰。以困七國之師。志慮一定。雖梁孝王不能奪者是也。其謀於人。則聽趙涉遮說。走藍田。出武關。抵洛陽。直入武庫。擊鑼鳴鼓而駭諸侯者。是也。善將者莫不如此。今之大將。號爲出群帥之右。

者、不過勇猛敢進、未聞長慮却顧、虚心下士、以謀爲
先者、求其據形勢、中機會、料敵制勝、不戰而屈人之
兵、豈可得哉、此不務謀而務勇之過也。陣貴分合。合
而不能分。分而不能合。皆非善置陣者。諸葛亮以石
布八陣圖於蜀江水中。晉大司馬溫見之曰、此常山
蛇勢也。擊首則尾應。擊尾則首應。擊其中則首尾皆
應。非能分能合。何以至此。自金人憑陵以來。未聞諸
將有與之對壘而戰者。率皆望風奔潰。間有畧布行
陣、爲其突騎所衝、一散而不復合。於古人置陣之意、
豈不相遠哉。魚麗偃月、平銳曲直、陣形雖殊、其欲能

分合一也。合而不能分。則非所以適變。分而不能合。則潰而已矣。古之陣法。皆能制敵於部位曲折之間。故諸葛亮以之擒縱孟獲。李光弼以之大破史思明。而今之陣法。徒爲文具。而不適用。此不務分合之過也。戰貴設伏。昔北戎侵鄭。鄭公子突謀爲三覆以待之。衷戎師前後。擊之盡殪。古之善戰者。未嘗不以設伏爲先。山川林莽。薈蔚深密。皆可伏兵。或誘之以利。而使前。或示之以怯。而使逐。薄於險阻之地。擊其首尾。而不得相援。斷其腹心。而不能相應。如猛虎陷於機穽之中。麕駭狼顧。鮮有不甚敗者。今之諸將。或有

與敵相遇。惟務力爭。不求謀勝。雖有小獲。未聞有能
大殲醜虜者。此戰不設伏之過也。是四者。今日諸將
之失。願陛下明詔之。使知古人用兵之深意。則於折
衝禦侮。致果殺敵之方。非小補也。昔高祖駕御韓彭
英盧。如指蹤獵狗。而得獸。光武駕御寇鄧耿賈。所向
無不成功。陛下十數年來。委任諸將。不愛高爵重祿。
以得其心。分以堅甲利兵。以作其氣。駕御之術。固非
愚臣之所能測識。然竊見朝廷近來。措置恢復。有未
盡善者五。有宜預備者三。有當善後者二。臣荷恩之
深。嘗蒙聖慈。特降親筆。有宜因疾置。時告嘉猷之語。

苟有所見其敢隱藏請試爲陛下詳言之何謂有未
盡善者五夫興師十萬日費千金聚人必以財理財
必以義以朝廷之威擅天下之利勢而欲措置財用
使養兵不乏何施不可善制國用者有生財之道有
節用之法有救弊之說有覈實之政有懋遷之術有
闔闢之權審此六者則雖養兵之多何患乎財用之
不足而朝廷初不畱意於此唯取於民之爲務降官
告給度牒賣戶帖理積欠折帛博糴預借和買名雖
不同其取於民一也上戶竭產不足以供買官資之
敷配下戶絕食不足以應科斗升之誅求物力耗屈

人心驚疑。如居風濤。洶洶靡定。夫民爲邦本。本固邦寧。基址薄。則棟宇有傾。危之憂。水泉涸。則魚鼈無生。養之理。爲父母而日削其子。飽腹心而自戕其肌。欲求久安。其可得乎。晉唐德宗。急於用兵。而有除錢陌。稅間架之令。遂致奉天之變。今日誠不可不以爲鑒。此未盡善者一也。夫千里餽糧。士有饒色。樵蘇後爨。師不宿飽。軍旅之興。糧餉爲先。而去季自江以南。縣地數千里。適有旱災。粒米惟艱。穀價翔踊。饒民餓殍。相望於路。雖浙西號爲豐稔。然以一路而供江湖數路之求。勢亦安能有餘。朝廷糴買。數目雖多。亦未必

兵車不
可不備

能豐衍。王師一動。運漕飛輓。何以能給。議者謂當因
糧於敵。臣竊以爲不然。使敵人聚糧。或有敗北焚蕩
而去。必不使爲我有。糧道不繼。爲患甚大。若欲取於
僞地之民。則官軍抄掠。甚於寇盜。有違弔伐之義。失
民望而堅從賊之心。非計之得。此未盡善者二也。金
人專以鐵騎勝中國。而吾之馬少。特以步兵當之。飄
暴衝突。勢必不支。平時不務所以制鐵騎之術。而亟
欲興舉。夫工欲善其事。必先利其器。況於戰陣之際。
國家安危所繫。豈可忽哉。此未盡善者三也。夫用兵
如奕碁。先能自固。乃能殺敵。根本之地。當以重制輕。

乃能安全。臂指之勢。當以大用小。乃能運動。今朝廷興諸路之兵。悉付諸將。外重內輕。指大臂小。平居已不能運掉。則緩急何以使之捍患而却敵哉。兵猶博也。本多乃勝。善博者徐出以待時。今乃罄所有以事一擲。其可乎。此未盡善者四也。臣於陛辭日。竊聞麻制。以韓世忠岳飛爲京東京西路宣撫使。聖意可謂斷矣。然兵家之事。行詭道。驚鳥之搏。必戢其翼。猛獸之攫。必匿其爪。藏殺機也。今者不得已而用兵。不知欲敵人之知乎。欲敵人之不知乎。欲敵人之爲備乎。欲敵人之不爲備乎。事固有先聲而後實者。然既有

其實。乃可先其聲。昔韓信虜魏王、禽夏說、不旬朝破趙二十萬衆、誅成安君於泚水上、故能發一乘之使、奉咫尺之書、使燕齊從風而靡。有其實故也。今吾軍初未嘗有其實。而遽以先聲臨之。其可乎。此未盡善者五也。何謂宜預備者三。中軍旣行。宿衛單弱。肘腋之變。不可不虞。此行在不可不預備者一也。江南東西、荆湖南北、兵將盡行。屯戍鮮少。敵人或有乘間擣虛之謀。則將何以待之。此上流不可不預備者二也。海道去京東不遠。乘風而來。一日千里。蘇秀明越。全無水軍。則下流不可不預備者三也。何謂當善後者

二。夫勝負兵家常勢。勝之非難。持久爲難。籍使王師
克捷。能復京東西地。則當屯以何兵。守以何將。金人
來援。當何以待之。此當善後者一也。兩路之民。懷戴
宋之心。有來蘇之望。久矣。旣得其地。而吾之力。足以
覆護之。乃可。萬一得其地而不能守。得其民而不能
保。兩路生靈。虛就屠戮。使兩河之民。絕望於本朝。則
恢復之功。難爲力矣。昔宋武帝長驅以復閩中。而卒
不能有。惟其善後之策。不先定故也。善奕者。其置子
之意。乃在於數十著之先。豈臨事而後慮哉。勝猶如
此。則所以圖爲善後之計者。宜如何哉。此當善後者

運籌帷
幄決勝
千里誠
五計也

二也。陛下天縱英武。念二聖於漠北。出自屠斷。圖此
武功。事勢旣然。必不得已。臣願獻愚計。軍政旣修。莫
若小試。勒兵於山東。夫山東天下之陸海也。賊豫賴
之以爲根本之地。與吾淮南境土相接。河渠相通。士
馬易行。糧餉易致。宜令韓世忠率師先臨。繼遣劉光
世爲之策應。張浚分兵以防江。岳飛重兵且屯襄陽。
勿輕動。以牽制其師。使不得應援。募敢死將士。繇海
道以擣其腹心。擇要害之地。控扼以斷金人來援之
路。京東郡縣。必有起而應者。撫綏料理。務盡其術。京
東可保。乃可徐事京西。此今日之至計也。臣蒙陛下

面諭以十數年來訓練士卒。今方可用。臣退而詢之。士大夫咸以爲然。區區愚慮。尚有可疑者。以謂吾之士卒。初未嘗與大敵力戰。則欲保其臨敵用命。無奔潰之虞。猶未易也。金百鍊則爲精金。卒百戰則爲精卒。故臣欲試之山東者。使戰得一勝。則士氣百倍。乘破竹之勢。所向無前矣。惟陛下裁幸。昔周宣中興。北伐則夷獫狁。南征則平淮夷。宜乎意氣勇銳。飈舉電發。然常武之序曰。有常德以立武事。因以爲戒。然則知有此武功。未嘗不以誠一之德爲主也。夫其進銳者。其退速。物理之自然。兵威方強。志慮太銳。一有挫

切遽自退屈。豈可謂之常德哉。高祖與項籍戰。其喪
師跳身者屢矣。然卒以此勝。堅忍而有常故也。昔魏
相之告宣帝曰。救亂誅暴。謂之義兵。兵義者王。敵加
於己。不得已而起者。謂之應兵。兵應者勝。爭恨小故。
不忍憤怒者。謂之忿兵。兵忿者敗。利人土地貨寶者。
謂之貪兵。兵貪者破。恃國家之大。矜民人之衆。欲見
威於敵者。謂之驕兵。兵驕者滅。相之論。可謂切當。夫
兵以義起。以應動。而不忿不貪不驕。是謂常德。此帝
王之所當盡心也。伏惟陛下留神幸察。臣昨在靖康
中。與聞國論。當是時。豈不願和。但欲和得其是。則兩

反覆引
辨無非
欲高宗
堅意用
兵勿為
和議所
惑耳

國生靈皆賴其利。今日朝廷之議。臣雖不得而與。然聞之士大夫。亦頗得其梗槩矣。臣素以治兵為然。豈不願戰。但亦欲戰得其是。則中興之業。自茲以始。夫天下士民。凡有知識者。孰不願陛下以戰則勝。以守則固。而早致中興之功。獨議和者不然。袖手旁觀。惟覲一有蹉跌。以售其說。臣願陛下以持重用兵。以多筭取勝。而無為議和者之所幸。天下不勝幸甚。取進止。

進取之序。先山東而後京西。此所謂攻其瑕則堅者瑕也。圖善後之策。使兩河之民不虛遭屠戮之慘。排因粮之說。使偽地之民不益堅從賊之心。此所謂以天下為度也。公固主

戰者也而務持重多筭運籌制勝所繇與好
勇倖功者異矣

天下士民無不願戰勝獨主和者袖手旁觀
惟覲一有蹉跌以售其說主和者之肺肝其
足食乎

李又玄評

謝到任表

紹興六年三月二十三日
到江西境受帥任

臣綱言伏奉告命除臣江南西路安撫制置大使兼
營田大使馬步軍都總管兼知洪州軍州事兼管內
勸農使臣已於今月二十三日到本路交割職事訖
者起膺分闡濫當江表之十連入覲行朝誤蒙晝日
之三接祇奉丁寧之訓勅敢辭疲役之驅馳已見吏
民布宣德意謝中伏念臣駑駘陋質樗櫟散材叨考爰

於風雲感會之初。迄無善效。備使令於盜賊披猖之際。頗著微勞。甘心流落者十年。徧嘗艱危者萬狀。茲蒙起廢。來從寂寞之濱。更許造庭。賜以從容之對。撫勞優渥。寵賜便蕃。凡鑠金銷骨之謗誣。皆見曉從風而散釋。迨承臨遣。深軫皇慈。乃眷大江之西。近接長淮之境。屢更兵火。繼以旱災。流移衆而田萊多荒。科歛煩而物力耗屈。欲禦寇則軍馬卑弱。將養兵則帑藏空虛。疆場弗寧。盜賊未殄。付以捍患禦災之政。宜得通方適變之材。顧臣何人。乃預茲選。此蓋伏遇皇帝陛下。日躋盛德。天覆群生。旣諒臣之忠誠。故委之

以要害之地。欲試臣以民事。乃任之以艱窘之時。而臣命蹇數奇。材疎志廣。終始維持於一意。俯仰無愧於此心。使足食及兵。而可爲。盡瘁敢忘於夙夜。儻求牧與芻而不得。乞骸願返於山林。

論賑濟劄子

臣昨者入覲。伏蒙聖慈。宣諭江西旱災。饑民闕食。使之推行賑濟。及至境上。又奉親筆詔書。令勸誘積米之家。以其食用之餘。盡數出糶。以濟流殍之苦。臣仰體天意。敢不夙夜自竭。以奉詔旨。自到本路。與監司協力。行移州縣。凡有流徙闕食之民。通融斛斗。盡令

給米收養、共賑濟五萬九十二人、又給曆州縣遣官
簡察、令勸誘積米之家、減價出糶、米麥穀二十一萬
八千一百二十四石五斗、其間亦有願入米麥、以助
官中賑濟者、臣已各項開具數目、別狀奏聞、訖、契勘
本路、連年旱歉、去歲尤甚、臣到任之初、米一升、價錢
至一百三十四文、近來雨澤霑足、早禾已熟、米價頓
減、新米一升、止四五十文、將來秋成、決有可望之理、
此蓋陛下勤恤民隱、至誠惻怛、聖德感召、和氣之所
致、然今春小民乏本、田畝有不曾種蒔者甚多、人情
方蘇、未可重取、更望朝廷寬假、有以涵養之、乃爲得

計昔周宣遇裁而懼、側身修行、而王化復行、前日旱
暵、安知不爲中興之資、在陛下特加聖意而已、干冒
天威、不勝戰越、存此以見當時民困乃至如此

乞差軍馬劄子

臣竊見江西路環數千里、爲郡十有一、爲縣五十有
三、控引荆湖、襟帶吳越、爲上流重地、去淮南京西、道
里不遠、平時商旅、繇獨木渡江、自光蔡以趨汴都、最
爲徑捷、當六朝時、九江豫章皆重鎮、屯兵選帥、以臨
之、今朝廷保據江左、審察形勢、知此地之要害、故與
江東荆湖、皆置大使、付兵二萬、假以重權、錢糧優裕、

贍養不闕、所以崇屏翰之勢、爲長久之策也。近年以來、軍馬撥隸他將、錢米隨亦轉移、疆場蕩然、無捍禦之備、倉廩枵然、無蓄積之資、而猶建置大帥、是有名而無實、其失本意遠矣。且以江東荆湖論之、建康有張俊一軍、當塗有劉光世一軍、武昌有岳飛一軍、猶足以奮張軍聲、以爲翰蔽。江西一路、獨無兵將、沿江上下千里之間、殊乏控扼、使敵人不來則已、如其果來、必乘間擣虛、則無如江西者矣。譬猶邪氣之傷人、必繇間隙、盜賊之妄意、必出無備、豈可忽哉。臣昨者入對、嘗具劄子、乞元降畫一指揮、軍馬錢糧之半、伏

蒙聖慈、察見本末、有矜從之意、降付朝廷、至今未蒙
應副、臣非不知方朝廷措置淮甸、恢復京東西、未暇
及此、然但知進前、不知備後、非策之得也。今沿江所
屯數十萬衆、摘萬人以爲一路根本、似未爲多。臣昨
自行在、將帶到申世景一軍、纔千餘人、分遣討捕盜
賊、已差出三分之二。見今諸郡竊發者紛紛未已。正
緣兵力單弱、不能鎮服所致。而欲使之捍禦大敵、豈
不難哉。雖依近降指揮、招補闕額禁軍、然未經訓練、
何可倚仗。非得正兵、相兼使喚、決誤國事。又舒蘄黃
三州實爲江西屏蔽、見聽本司節制、亦無軍馬。內舒

州隸劉光世。蘄黃州隸岳飛。臣近已具奏聞。乞於劉
光世軍中。摘那二千人。屯駐舒州。於岳飛軍中。摘那
四千人。屯駐蘄黃州。緩急聽臣節制。亦未奉指揮。伏
望聖慈。特降睿旨。下都督府。如臣前奏所乞。差吳錫
等軍一萬人。充江西大使司軍馬。仍令劉光世岳飛
分兵屯戍舒蘄黃州。與江西相爲表裏。庶幾敵人不
敢窺伺。一路生靈。恃以無恐。不勝幸甚。臣以衰病。難
當重寄。已具奏乞依舊在外宮觀差遣。必冀矜從。然
不敢以將去之故。不爲國家深慮至計。伏望聖察。
以千餘之軍遣三分之一分捕盜賊。每部不
過數百人。而所向有功。則公之成功奇而用

心苦矣

李又玄評

應詔條陳七事奏狀

臣伏觀近降詔書、以地震求言、雖芻蕘之微、亦得上達、況臣嘗備近司、荷恩隆厚、受知特深、苟有所見、豈敢隱默、輒罄狂瞽、冒塵天聰、伏望聖慈、特賜睿覽、謹條具奏聞、

一臣聞地道積陰。以靜爲德。理不當動。動必有變。春秋二百四十二年間。地震五。聖人必謹而書之者。志變也。漢唐以來。或頻年震。或一年數震。變不虛發。其感召之因。皆有所自。可攷而知。廼

者六月乙巳地震于駐蹕之所陛下克謹天戒降詔求言誠得警懼修省之道然臣聞應天以實不以文天人一道初無殊致唯以至誠可相感格臨變而懼變已則忘有畏天之言無畏天之實皆不足以銷弭變故導迎吉祥凡以無至誠惻怛之意故也夫夷狄兵革女子小人皆爲陰類願陛下致察於數者之間每事致戒則反災爲祥何難之有昔成湯遇旱禱於桑林以六事自警而雨澤時至天人之際應若影響不可誣也臣願陛下凡應詔上封事者特加省覽其

言可採、降旨亟推行之、不必加賞、夫忠義之士
有愛君憂國之心者、但以言聽計行爲志、豈待
賞而後勸哉。至於草茅疎遠、不識忌諱、論議激
訐、亦望容貸。以來直言、日慎一日、不以天地之
變爲出於偶然。如日月之蝕、旣過、則怠於修省。
此乃所以爲應天之實也。天下不勝幸甚。

一臣竊聞諸道塗、車駕將有建康之幸、旣降旨以
趣營繕、又具例以勅百司、此誠甚盛之舉。然日
候一日、未聞下戒行之詔。豈猶有所疑而未決
邪。夫建康在東南爲形勝之地、在今日爲不可

不駐蹕之所。臣嘗條具奏聞屢矣。天時地利。人事。皆當捨臨安而幸建康。比者地震。不在諸郡。而在臨安。不在他所。而在宮禁。此無他。天意欲陛下有所遷動。避危以趨吉而已。夫懷土以安。實能敗名。昔公子重耳。安於齊。子犯謀醉而遣之。自齊適秦。秦伯納諸晉。遂成霸業。今陛下久駐蹕臨安。躊躇未遷。無乃有安之之意邪。不然。天意何以丁寧告戒之。若此。此天時之不可不。幸建康者一也。臨安褊迫。偏霸之地。非用武之國。又有海道不測之虞。曷若建康襟帶江湖。控

引淮浙。龍蟠虎踞。自古稱爲帝王天子之宅。此
地利之不可不幸建康者二也。諸將重兵已皆
分屯淮泗。陛下時乘六龍。躬率六師。進臨建康。
則將士之氣百倍其勇。號令賞罰皆出睿斷。人
人願戰。前無堅敵。與夫深居而遙制。豈可同日
而語哉。此人事之不可不幸建康者三也。臣願
陛下斷自宸衷。不貳不疑。投龜而決。早降詔旨。
以慰士民之心。庶幾中興之運。不日可致。伏望
留神幸察。

一臣竊觀古之善治兵者。必多其將之員數。而少

給之兵。所以爲臂指聯屬。易相運動之術。漢光武之二十八將是也。又必重內輕外。以爲強本弱枝。表裏相濟之術。唐府衛之兵是也。祖宗制兵。每將不過五千人。其不隸將者。每指揮不過五百人。有事則臨行陣。無事則歸營壘。此得所謂多將員而少給兵之法。盡屯天下重兵於京畿。足以制四方州郡之兵。又設禁旅。拱衛王室。此得所謂重內輕外之意。海內平定。幾二百年。靡有兵革。職此之故。今陛下震皇武以圖恢復之烈。盡以重兵分隸諸大將。多者至十數萬人。

平居已不能運掉。而況於倉卒擾攘之際乎。宿衛卑弱。初無正兵。緩急何以衛宸極。而禦外侮。此臣之所以夙夜寒心者也。雖陛下恩信足以結之。威德足以服之。手撫指顧。莫不從令。然立國之道。當爲長久之策。恐不應如此。臣愚伏願陛下常留聖意。偏裨中有可用者。親加識擢。漸付以兵。使自成頭項。以備緩急驅策。或收召舊人。或選擇將士。廣置禁旅。更番宿衛。使爲天子正兵。考漢唐之舊制。遵祖宗之成憲。稍復前規。銷弭後患。以早致中興之功。天下不勝幸甚。

一臣聞兵法。欲致人而不致於人。此猶碁家之爭先法耳。故善碁者之置子。必能制於數路。善兵者之禦敵。必能禁其四出。今諸將大兵列屯淮泗。又以宰相督之。可謂重矣。敵人亦必聚其犬羊。以抗王師。則京西一帶。必有力不暇及之處。願詔劉光世專事陳蔡。岳飛專事唐穎。使敵人分兵以拒我。則淮泗之力紓。使不能分兵。則乘間擣虛。吾無遺策矣。今劉光世軍已進據合肥。而岳飛大軍尚留武昌。未進誠恐緩不及事。坐困錢糧。未見其可。伏望聖慈特降詔旨。督促其

行、庶幾不失機會、今冬可無衝突之虞。願加睿
察、

一臣聞行師用衆、糧餉爲先。雖有堅甲利兵、非粟
無以戰。雖有高城深池、非粟無以守。有國家者、
無三年之蓄、曰不足。而況於月支日給。乃旋爲
之計乎。去歲旱災之廣、縣地數千里、穀斗有至
千餘錢者、常賦損於減放、漕計困於轉輸、常平
義倉、匱於賑濟、公私枵然、皆無儲蓄、使今秋復
繼之以水旱、其何以堪。所幸天道佑順、雨暘時
若、遂成有年、江浙閩廣、悉皆登豐、目今米價已

減將來糴事告成粒米定須狼戾此誠朝廷廣
糴儲蓄之秋也。昔趙克國討先零嘗謂塞下糴
四十萬斛賊豈敢動哉繇是觀之國以兵爲命
兵以食爲天何可少緩夫穀太賤則傷農乘登
豐之歲以善價廣糴官有儲蓄而農不告病是
行一事而兩利也朝廷近降糴本付轉運司限
數收糴固爲得策然轉運司不過分降諸州諸
州不過分降諸縣諸縣不過敷配人戶強委之
直而責其粟則是有和糴之名無和糴之實非
計之得也。臣愚伏望聖慈特降睿旨令諸路州

郡以轉運司所分糴本、專委官吏、置場收糴、其
初卽以善價、取之民間、量增分數、嚴立約束、使
無邀阻糜費、則人戶商旅、自然樂輸、數百萬斛、
不難辦也、始時民間、唯患交子、恐難行用、今朝
廷旣改交子之法、以爲關子、卽與見錢無異、自
可通行、唯官告勅牒、須勸誘上戶、使之入納、亦
乞令州縣、以勸到見錢、付之糴場、使之收糴、庶
幾革近年科糴之弊、公私兩濟、天下不勝幸甚、
一臣竊見朝廷近年以來、委辦州縣、或製造器用、
或收買物色、期限太嚴、督責太峻、州縣官吏、不

敢申明、如期應命、但欲塞責、而不爲長久之計、遂使公私皆受其弊、而卒無補於實用。如福建之舩海舟、製造滅裂、尋卽損壞、廣南之買耕牛、道里遼遠、率多斃踣、此皆所費不貲、無益於事、不可不察也。夫創造不精、曷若買舟之可久、遠致多斃、曷若厚價以招來。雖有所費、蓋不得已。如其不然、所傷實多。方朝廷用兵之際、財賦窘迫、豈可不計較愛惜、而耗蠹於無用之地哉。臣愚伏望聖慈、特降睿旨、今後朝廷拋降製造、收買物色、或期限太迫、或土產非宜、並許州縣申

陳利害、從長相度以聞、朝廷更加審察而施行之、庶幾公私兩便、無虛費而有實利、天下不勝幸甚、

一臣竊見朝廷前此數年、專以遐避爲策、亦不責州郡以捍守、又降詔旨、許令保據山澤、以自固、城壁守具、率皆不治、循習旣久、徃徃以修城壁爲生事、建議官吏、反受罪責、如連南夫以修泉州城、委官體寃、裴廩以修衡州城、重加貶黜、州郡望風畏縮、無敢復議修城者、夫以偷惰苟且之習、而重之以朝廷威令、其誰敢復冒罪責、而

建長久之計乎。臣恐自此州郡城壁壕塹頽毀
湮塞不復修矣。今與僭逆之寇壤地相接。無數
百里之遠。而沿江表裏數十州郡。朝廷所恃以
爲藩籬者。蕩無城池。可恃以守。卒然賊馬警急。
迫摩封疆。不知何以禦之。此臣之所不能曉也。
臣愚伏望聖慈。特加睿察。令朝廷熟議。如捍禦
之計。非城池不可。卽乞降旨。明告中外。以昨來
罪責官吏。自緣搔擾。非以修城之故。應沿江州
郡。候今冬農隙。許之漸次修築城池。建置樓櫓
之類。朝廷特與應副。庶幾自保之計。旣備。進計

之策可行。天下不勝幸甚。

以正兵屯淮泗以奇兵擣京西使彼分兵則淮泗之力舒彼不分兵則擣虛之計得此理易見而不能用者殆有庸懦之鬼宅于其胃故恫疑莫決耳

李又玄評

車駕巡幸江上起居表

臣綱言、伏覩進奏院報、九月一日、車駕進發、巡幸江上者、鑾輅順動。法天道以省友、靈旗指麾。慰民心而伐罪。號令所及。呼舞惟均。臣綱誠惶誠懼頓首頓首。恭惟皇帝陛下、孝悌通于神明、覆載侔乎天地、念父母之辱。欲救之於閔河萬里之間。憫烝黎之難。將拯之於塗炭十年之後。採之公論。斷以必行。方其發軔。

之初。已有中興之象。勞軍細柳。想按轡而徐驅。督戰
澶淵。宜應弦而遠遁。凡爲臣子。咸願翼從。况臣嘗備
近司。最蒙殊獎。守藩條於外服。莫陪羈勒之餘。望日
御之所臨。徒深葵藿之志。臣無任瞻天望聖。激切屏
營之至。謹遣左宣教郎、本司幹辦公事臣羅薦可、詣
行在所、奉表起居以聞。

乞降詔諸帥持重用兵劄子

臣近嘗具奏、論諸帥重兵、盡屯淮上、虜僞亦必聚其
犬羊之衆、以抗王師、則京西一帶、必有力不暇及之
處。宜詔岳飛進兵、可以得志。近據岳飛公文、分遣兵

將收復鎮汝軍、商號等州、殺獲甚衆、所得糧儲不貲、頗如臣之所料。然臣竊謂大兵弔伐、當以招納爲先、不在廣行殺戮。收復境土、當以保守爲上、不在亟務攻取。願詔諸帥、約束將士、使明知陛下之德意、則中原士民、日俟王師之來、響應影從。大功易集。臣又聞虜僞相與定謀、不爭城邑。縱我師使深入、而斷其歸路、使果出此、不可不戒。願詔諸帥、以持重用兵、勿爲利誘而墮其計中。則師出萬全。區區愚慮、庶有補於萬一、伏望聖慈、特賜睿察。

僞境本吾境而僞境之民本吾民也弔伐以招納爲先不在多殺復境以保守爲上不在

亟攻藹然王佐
之言 又玄評

乞罷江西帥劄子

乞兵疏二十上
竟不報始乞罷

臣輒瀝血誠仰干天聽。還惟冒瀆。死有餘罪。伏念臣
鄙樸無取。誤蒙聖恩。起廢於十年流落之餘。畀付以
一路兵民之寄。夙夜黽勉。期稱所蒙。適丁僞虜猖獗
之秋。當爲防冬捍守之計。而臣本司軍馬。盡已撥隸
諸將。沿江千里要害之地。初無數旅控扼之兵。累具
奏陳。未蒙差撥。今者邊郡探報。羽檄交馳。朝廷行移。
星火緊急。皆謂賊馬屯聚。將爲擣虛之謀。惟臣本路
空虛。初無禦敵之具。儻使犬羊之衆。來犯封疆。則夫

士民之心。何所倚仗。臣已再上章疏。控告朝廷。乞摘
邠都督行府之偏師。及勾抽福建廣東之半將。濟此
危急。庶能保全。臣聞有言責者。不得其言則去。有官
守者。不得其職則去。帥守江西。臣之職也。朝廷付臣
以一路。委任重矣。不知緩急之際。責臣以守乎。不責
臣以守乎。責之以守。則必與之以可守之具。不責之
以守。則非獨朝廷今日事體。不可如此。亦非臣平日
之素志也。如蒙朝廷俯從危懇。使兵力糧可支梧。則
賈誼所謂守圉捍牧之臣。誠死城郭封疆者。臣雖無
似。竊庶幾焉。儻或所陳不合。廟畧。卽乞朝廷。以臣不

材。先次罷黜。使得歸老山林。保全晚節。亦臣區區之至願。伏望聖慈。特降睿照。憐臣堅請。力爭。蓋憂於誤國。察臣難進易退。非薄於愛君。早賜矜從。以安愚分。謹齋沐親書劄子。干冒天威。無任惶懼。戰越待罪之至。

論擊賊劄子

臣竊觀自古用兵者。相持旣久。則非出奇。不足以取勝。曹操袁紹官渡之事是也。王師與虜僞。相持於淮泗間。幾半年矣。前日岳飛之舉。我出奇也。惜乎以錢糧不繼。而勾回軍馬。未能成功。今日賊馬渡淮。彼出

奇也。若能設策破之。則奇反在我。臣願陛下速遣得力兵將。自淮南前來蘄黃間。約岳飛兵。相爲犄角。以夾擊之。期於必勝。以復陳蔡。則淮泗之師。亦當自解。大功可成。至於江南屯兵控扼。以捍奔衝。自是一段不可闕也。伏望聖慈。特賜睿察。取進止。

彼出奇而我設策破之。則奇反在我。此碁家換先法也。古兵法多出此。願人不悟耳。

再乞罷帥劄子

臣近者冒萬死干天聽。乞罷臣江西帥任。依舊除一在外宮觀。或守本官致仕。未奉俞允。伏念臣材能無取。誤蒙聖恩。帥守一路。夙夜龜勉。願效涓埃。以圖報

知遇之萬一。而臣自今春入覲之初。卽論本路爲上
流重地。去敵境不遠。朝廷建置大帥。付兵二萬人。近
來撥隸他將。靡有存者。竊慮不足以折衝禦侮。鎮服
一方。乞差萬人。庶可集事。伏蒙宣諭。以臣言爲然。旣
而降付朝廷。止是閑送都督行府。累具利害。申都督
行府。止云見議遣兵。自春徂冬。初無一人一騎至者。
方用兵之際。邊報警急之秋。付臣千里之寄。而軍馬
單弱。曾不足以薄具防守。臣雖至愚。豈敢貪戀寵祿。
虛任重責哉。所以不避斧鉞之誅。乞歸山林。非獨以
衰年多病。不任繁劇之故也。重念臣自靖康以來。爲

國深慮。心之精微。衆人不達。皆以至戰歸之。姓名誤落於虜中。尤爲敵人之所不喜。使其知臣塊守空城。於此無兵可以爲用。其致寇必矣。如臣者固無足道。然嘗爲大臣。被遇三朝。使失守殞身。上累國體。雖死不足以塞責。伏望聖慈哀憐。特降睿旨。簡會臣前奏所請宮觀。或致仕。早賜施行。臣不勝幸甚。

付公以當一面而無兵無將無錢糧而使之忍一路之憂責廟堂諸人不足惟張德遠似不應尔

李又玄評

乞差發軍馬劄子

臣伏准御前金字牌。降下樞密院。今月十七日。劄子。

以臣乞除在外宮觀差遣。或許守本官致仕。備奉聖旨不允。令學士院降詔。仰荷聖恩。但深感涕。伏念臣材能無取。誤蒙睿獎。起於閑廢之中。付以方面之寄。夙夜龜勉。願效涓埃。以圖報知。遇之萬一。自到本路。適當旱暵。闕乏之餘。金穀細碎。皆躬親料理。粗能支措。應岳飛大軍錢糧。亦不敢闕乏。建置營房。修葺城壁。制造器甲。安集流移。招捕盜寇。皆稍就緒。惟是軍馬單弱。不足爲一路防守之具。自非朝廷應副。則新招烏合之衆。何足倚仗。累具奏陳。未蒙差撥。近者邊報警急。賊馬渡淮。侵擾淮西。州縣沿江一帶。要害去

情詞懇切

虜並無控扼。人情震恐。臣深慮倉卒之際。或有衝突。與其無兵捍禦。受失守之誅。曷若控告君父。爲退作之計。情迫辭切。日虞譴訶。豈謂皇帝陛下。察其精誠。憫其拙直。旣賜以詔書。不容遽去。又諭以所乞兵馬。別作施行。雖父母之於子。恕其愚而拯其急。不是過也。今者王師大捷。賊兵遁逃。固足以舒目前之憂。爲中外之慶。然月始初冬。解嚴之期尚遠。兵貴預備。黠虜之衆尚多。正當益虞。大敵愈修。軍政防患。於不必防之地。持勝爲不可勝之謀。用正爲奇。濟虛以實。則江西一路。尤今日所當留意也。臣竊恐朝廷以旣捷

之後。便謂可以無虞。兵馬不必調發。間隙不必隄防。則非臣所敢知也。伏望聖慈。速降睿旨。所遣本路軍馬。早賜施行。及臣所乞李貴韓京一半兵將。特如所請。庶幾捍禦有備。可以輯寧一路。仰報大恩。哀病之軀。終冀矜從。得安閑散。干冒宸聰。無任惶恐。戰越之至。

奏陳防秋利害劄子

臣伏覩樞密院劄子行下。捷報劉光世張俊楊沂中等。大破僞齊賊馬於淮淝之上。斬馘擒捕甚衆。殘黨遁歸淮北。此誠陛下天錫勇智。道兼神武。駕御將帥。

恩威並行所致。露布所傳。中外同慶。然臣竊見間探所報。僞齊乞兵於虜人。其統領來者。如四太子龍虎大王。渾女渾金牌郎君之類。頭項頗多。未聞有渡淮而南者。其侵犯淮淝。及光山六安等處。止是李成孔彥舟。叛將簽軍。深慮賊情狡獪。匿重兵於後。而以簽軍來嘗我師。若一勝之後。兵驕氣惰。則爲患有不可勝言者。加以時方初冬。去解嚴之期尚遠。合當措置防守去處。更宜嚴爲之備。伏望聖慈。降詔諸將。旣加獎諭。又戒其無以戰勝而驕。益務淬礪。以待大敵。仍命朝廷。按圖以視諸路。其路固實。當設疑以款賊兵。

其路空虚。當增兵以禦侵掠。使江淮之間。表裏相資。首尾相應。萬一虜騎衝突。墮吾術中。王師能取勝於金冠。則恢復之功。在此一舉。不再籍矣。臣以迂陋疎遠。輒議大事。罪當萬死。伏望聖慈。特加睿察。取進止。

宋李忠定公奏議選卷之十一

明

皖桐左光先羅生選

宗人李春熙韓如輯

宋 李綱伯紀著

筠州戴國士初士較

宗裔李嗣玄評定

謝獎諭表

臣綱言、伏奉詔書、以臣奏陳防秋利害、切中事機、特加獎諭、臣已望闕謝恩、祇受訖者、瞽言上達、方虞出位之誅。溫詔誕敷、更被自天之寵。載惟叨冒、深切凌兢。中謝伏念臣識慮迂疎、材能譾薄。所願學俎豆之事。

未嘗讀孫吳之書。偶當戎事之艱危。輒罄愚悖。而忤
度。惟憂國愛君之心切。故苦口逆耳之言多。亮之者
謂懷匪躬之誠。笑之者謂犯斯辱之戒。但知自竭。豈
暇恤他。正如野老之獻芹。敢意聖君之采菲。伏蒙皇
帝陛下。天地容納。日月照臨。嘉其千慮一得之愚。獎
以細書十行之札。褒踰華衮。賜重萬金。蔀屋爲之生
輝。士民忽焉改觀。臣敢不激昂素志。砥礪孤忠。益思
料敵制勝之謀。以助禦侮折衝之計。靈旗所指。方勒
燕山之銘。崖石可磨。願撰浯溪之頌。

惟憂國愛君之心切。故苦口逆耳之言多。是
千古忠臣小影。惟木從繩。則直。惟后從諫。則

聖是千古英主胚
胎 李又玄評

再陳已見劄子

臣今月十日、准御前金字牌、降到樞密院劄子、奉聖
旨、以臣奏陳防秋利害、切中事機、令學士院降詔獎
諭、劄送臣照會、仰荷聖恩、第深感懼、伏念臣竅啓寡
聞、初無智畧、徒以誤膺知獎、實同安危、故敢每以瞽
言、干冒睿聽、伏蒙皇帝陛下、天地容納、日月照臨、不
惟恕其狂愚、又復獎以優詔、顧臣何人、可以當此、惟
知自竭、以報鴻私、臣竊見國家與虜僞相持、累年以
來、未有如今日之捷也。原其所以致此、蓋緣六飛親

臨將士用命之故。儻非車駕在近。威令可行。則淝水之師。安能旣退而復進。變敗而爲成哉。前年親臨。則虜騎宵遁。今年親臨。則僞齊奔北。其效昭然可見。臣願陛下乘時稍進。以臨鎮江。號令王師。士氣益振。則雖黠虜陰遣援兵。未必不聞風而退屈。昔漢祖親臨垓下。而西楚以亡。真廟親臨澶淵。而北戎以服。自古創業中興之主。未有不履危而求安者。惟陛下斷以不疑。布昭聖武。以定大業。天下不勝幸甚。臣又竊思國家近年。以激勸將士之故。每一戰勝。則不計首級。全軍推賞。習以成例。帑藏爲虛。今者諸將咸捷。當行

慶賜欲廣其施。則懼物力之不給。欲小其賜。則懼士
心之未厭。此尤所當慮者也。夫人情感激。有不待賞
而勸者。推賞先後。有未下車而封者。臣願陛下降哀
痛之詔。憫將士罹兵革之苦。凡死於戰陣。先加封爵。
厚賂賻贈。收卹其家。死者褒。則生者勸矣。然後明詔
統帥。審定功狀。俟防冬解嚴。慶賜併行。其誰曰不然。
昔勾踐厚養死事。而士卒思奮。漢祖先封雍齒。而反
側者安。急先務也。臣愚不達大體。惟陛下裁察。

戰勝不計首級。乘勢蹙敵。如轉巨石於萬仞
之巔。以摧枯朽。此用兵要訣也。然全軍推賞。
則濫賞之弊。滋要在有術以權之。揔在統帥
得其人耳。

李又玄評

奏陳生擒僞齊賊衆劄子

臣竊見近日諸將獲捷。其捷報內並稱生擒僞齊賊衆。多者以萬數。少者亦不下數千人。除願充軍外。餘皆給據放散。所獲糧斛。多者十餘萬石。少者亦不下數萬。除給散外。盡皆焚毀。契勘諸路招捕盜賊。卽有給據放散歸業之理。今來僞齊賊黨。雖元係朝廷赤子。絳州縣未盡收復。其給據之人。寔無所歸。若令依舊歸僞齊州縣。將來不免。又被驅脅從軍。死於鋒刃。誠可矜憫。今江淮間曠土甚多。見措置營田。全少人夫。可以耕作。臣愚伏望特降睿旨。行下諸將。今後生

二項最
為措置
得宜

擒到偽齊賊衆。除揀選願充軍外。餘人並管押赴江
淮荆湖。逐路帥司。令措置分俵。充營田使喚。寔爲利
便。其所獲糧斛。亦乞指揮。務令愛惜。或可保守。或可
搬運。或可給散。隨宜措置。勿令焚毀。以爲將來大兵
就糧之資。寔爲得策。伏望聖慈。特賜詳察。

偽地之民本吾民放歸是也然歸而使之致
死於我且未免復死於鋒刃名生之實殺之
也不若使之營田以養兵其所獲糧料愛惜
椿收使大兵有所因而來歸者有以養尤爲
得策

李又玄評

乞泐淮漢脩築城壘劄子

臣伏觀手詔。車駕將乘茲春律。駐蹕建康。此誠至當。

李忠定公奏議

卷之十二

四

甚盛之舉也。臣昨奉詔書、條具邊防利害、嘗論駐蹕建康、爲措置之所、當先然其說、謂淮南有藩籬之固、則建康可都。宜命諸將、移重兵於江北。料理營田、葺治城壘、則藩籬可成。今大將旣已移屯矣。營田旣已施行矣。楚泗旣已修築城壘矣。惟是浚淮、如廬壽。浚漢、如襄鄧等處、尚未措畫。臣願陛下、降詔劉光世、岳飛、乘士卒之暇、以漸修築。如韓世忠之於楚、張俊之於盱眙。楊沂中之於泗。使名城堅壘、縣亘相望。以張國勢、以讐敵心。又命朝廷、選通知古今臣僚、按行淮漢。深考古跡、要害控扼之地。如濡須塢、牛渚圻之類。

築壘屯兵。益務自固。使大羊無侵突之虞。貔虎有蓄
銳之利。以守則固。以戰則勝。此今日之上策也。夫守
戰一道也。能固守而後能進戰。是守者進之基也。譬
如奕碁之家。凡欲勝人。先須自固。此言雖小。可以喻
大。今陛下旣已斷自淵衷。不貳不疑。駐蹕建康。以承
天意矣。伏望聖慈。益修戰守之備。以建中興之功。天
下不勝幸甚。臣以衰病。見丐閑散。不勝臣子愛君憂
國之誠。輒復自竭。冒昧以聞。或有可採。亦臣仰報聖
恩之萬一也。

守者進之基。能固守而後能進戰。可謂片言
居要。深考古跡。要害之地。如濡須塢。牛渚所

之類皆宜築壘屯兵是基家冷着今流寇縱橫此爲先務 李又玄評

道君太上皇帝升遐慰表

臣綱言、今月初六日、准尚書省劄子、正月二十五日、三省樞密院、同奉聖旨、何薳奉使廻、得大金國、右副元帥書、具報道君太上皇帝、久遠和豫、厭世升遐、禍變非常、五情崩潰、叩地號天、無所迨及、凡在臣庶、悉同哀慕、臣已率在州官吏、於今月初七日、舉哀成服、訖者、國家鍾九六之運、鑾輿有沙漠之行、遽厭棄於人寰、遂上賓於帝所、徒抱遺弓之恨、莫聞憑几之言、臣民痛心、天地改色、臣綱誠哀誠痛、頓首頓首、伏以

道君太上皇帝。聖繇天縱。道本生知。適遭醜虜之悲。
陵。因致翠華之播蕩。閑河萬里。霜露十年。朔野馳心。
猶佇八龍之返。使輶通問。空纏九土之悲。恭惟皇帝
陛下。備極人倫。敬崇聖孝。孺慕不忘於宵旰。深思欲
見於羹牆。嘗瞻枕戈。夙講奉迎之計。問安視膳。阻伸
致養之誠。罹此閔艱。何以堪處。伏望爲宗社之大計。
副生靈之至情。少抑聖懷。俯從禮制。冀昊穹之悔禍。
乘將士之奮忠。報不共戴天之讐。神人所助。建中興
復。古之烈。華夏未寧。

寧德皇后上仙慰表

臣綱言、今月初六日、准尚書省劄子、正月二十五日、三省樞密院、同奉聖旨、何薜奉使迴、得大金國右副元帥書、具報道君太上皇帝、久違和豫、厭世升遐、寧德皇后、亦已上仙、禍變非常、五情崩潰、叩地號天、無所迨及、凡在臣庶、悉同哀慕、臣已率在州官吏、於今月初七日、舉哀成服訖者、天柱傾而絕地、維日華虧、而沈月魄、矧陟方於遐域、尤軫慕於聖懷、承命震驚、拊心摧殞、臣綱誠哀誠痛、頓首頓首、伏以寧德皇后、體儼宸極、德合坤靈、上皇資內助之賢、淵聖嚴堦儀之奉、徽音流乎海宇、懿範著於宮闈、遭國步之艱難、

詞旨不宣
愴令人讀
之歎

從鑾輿而出狩。惟備嘗於險阻。致或爽於興居。間寢
龍樓。莫遂九重之養。傳音沙漠。空遺萬國之悲。恭惟
皇帝陛下。夙蘊孝思。永懷慈訓。以富貴崇高。而不得
盡人子之志。以兵威強盛。而未能報敵國之仇。忽凶
計之遽聞。諒至情之曷處。念四海亂離之未靖。膺兩
宮寄託之匪輕。嘗瞻有爲。冀刷憑陵之耻。茹荼雖痛。
願寬哀慕之情。用慰在天之靈。是爲報親之義。

乞推廣孝思益修軍政劄子

臣伏觀皇帝陛下。以奉使何薨回。得金國右副元帥
書。報道君太上皇帝。久違和豫。厭世升遐。寧德皇后。

亦已上仰聖情追慕孝思罔極顏色之戚哭泣之哀
群臣不忍仰視傳於四方莫不殞涕雖遵國家舊制
以日易月而宮中自行三年之喪雖俯徇宰執百官
之請七降批荅始以軍事方棘不得已而從之猶施
素幄聽政於几筵之側聖孝隆厚度越百王簡冊所
載未之有也臣聞之禮經曰父母之讐不共戴天爲
匹夫而能復讐者前史美之況於萬乘之主乎金人
不道以其詐謀陵中國破都城邀兩宮以北狩而置
之漠北苦寒之野飲食衣服醫藥皆不得如意以至
此大故此陛下不共戴天之仇也計音之來旣不以

時又以朝廷新有武功、始遣使回、具報凶問、皆其姦計、豈誠意哉、遣發使人、奔問諱日、奉迎梓宮、在人情固不可後、然或從或違、處其度內、皆未可知、臣恐議者又以此爲敵人之重有害於吾自治自疆之術、則在朝廷不得不先定其策也、自建炎以來、爲和議所誤、專務退避、國勢日蹙、主威日削、失天下者太半、方幸近年天啓宸衷、悟和議退避之非、爲治兵進討之計、天聲漸振、虜僞震驚、將有恢復之期、儻或緣此墮其計中、小不忍以亂大謀、則爲害有不可勝言者矣、昔新城三老說高祖曰、明其爲賊、敵乃可服、高祖聽

之三軍縞素、爲義帝發哀、率諸侯東嚮、以誅項籍、而漢楚勝敗之勢遂分、今陛下詔屯邊將士、不用舊例、盡爲道君太上皇帝舉哀、其策得矣、臣聞將士感憤、至有感哭、連日不輟者、人心戴宋、追思道君太上皇帝恩德、久而不忘、於此可見、臣願陛下順人心、承天意、益廣孝思、施之行事、枕戈嘗膽、修政攘戎、以報不共戴天之仇、以刷中國之耻、一飲膳、一寢興、無不以兩宮大故爲念、則必有合於天人之願者矣、匹夫之孝、感動天地、至有魚躍于水、荀生于冬者、而況陛下貴爲天子、富有四海、孝悌之至、通于神明、聖心感格、

所欲其有不從者哉。臣以愚直荷道君太上皇帝知遇。雖嘗抵牾。終不棄捐。奉迎南都。恩撫甚渥。聞問哀慟。不如無生。惟有孤忠。願納之陛下。故敢罄其狂瞽。不避斧鉞之誅。妄有獻陳。伏望聖慈。不以人廢言。與五六大臣。深議而力行之。天下不勝幸甚。

金人以生道君市猶可言也。旣晏駕則奇貨已矣。乃又奔問計日奉迎梓宮。復以市重之。柄倒授敵人。此何爲者。兵法固有激士心之憤。而用之者將士感哭連日。憤敵深矣。不因其憤而用之。而耳爲仇。役高宗于是乎爲不予矣。
李又玄評

車駕巡幸建康起居表

紹興七年公在江西上

臣綱言。伏覩都進奏院報車駕以二月二十七日進

發巡幸建康府者。乾旋坤轉。共知天意之回。雷動風
行。頓覺皇威之暢。御六龍以于邁。屯萬乘於要區。三
靈歡欣。四海呼舞。賀中竊以江左之形勝。莫如建業之
渾雄。自昔稱帝王之州。於今爲東南之會。控引淮海。
襟帶江湖。豈惟民物之阜蕃。寔乃舟車之輻湊。玉麟
神聖。晉以中興。虎踞龍蟠。吳資用武。兵戈之後。王氣
方隆。皇帝陛下。慨國步之多艱。憫帝都之未復。因其
天險。濟以人謀。高祖之固關中。戰必勝而攻必取。光
武之保河內。利則伸而鈍則蟠。赤縣神州。行遂定都
於河洛。靈川沃野。聊茲臨幸於江山。方將張皇六師。

震疊中土。駕馭貔虎。翦屠鯨鯢。掃陵寢之氛埃。葺宗廟之鍾簾。恢復故境。再臻太平。而臣誤被宸恩。濫當闔寄。雖長隄新廐。竊慕於韋鼎。顧重鎮上流。有慙於溫嶠。心馳魏闕。莫參鴛鴦之行。地近日畿。益傾葵藿之志。

論建中興之功劄子

臣伏觀車駕以仲春令辰發軔吳門。巡幸建康。斷自宸衷。不貳不疑。慨然有恢復土宇。掃清中原。拯濟烝黎。戡定禍亂。克剪大憝。刷耻復仇之志。天下臣子莫不望風鼓竦。抃蹈踊躍。願少須臾無死。以觀中興之

功誠甚盛之舉也。臣竊觀自古建功立事。扶持社稷之臣。未嘗不以立志爲先。申包胥聞伍員有覆楚之言。則曰我必存之。其後哭秦庭以乞師。卒如其志。張柬之語武氏於荆南江中。其後卒復唐祚。垂祀三百一夫發念。其烈如此。而況以聖明之資。爲萬乘之主乎。高祖之志。見於不肯鬱鬱久居漢中。而與韓信論定三秦之策。光武之志。見於披輿地圖於信都城樓上。與鄧禹論天下大計。此皆志定於前。功成於後。初似落落難合。而卒能建大功。立大名。定大業。功施於當年。名垂於後世。載在典冊。不可誣也。恭惟皇帝陛

下天錫勇智。運屬艱難。遵養時晦之久。應機立斷。愔然改圖。思欲撥亂興衰。光復祖宗之大業。故親揔六師。以臨江表。捨去吳越。而幸建康。漸爲北伐之計。志慮規模。可謂宏遠矣。臣願陛下益廣聖志。擴而充之。與神爲謀。日新其德。勿以去冬驟勝。而自怠。勿以目前粗定。而自安。凡可以致中興之治者。無不爲。凡可以害中興之功者。無不去。有所規畫措置。必以天下爲度。必以施於長久。可傳於後世爲法。則中興不難致矣。夫中興於用兵。止是一事。要以修政事。信賞刑。明是非。別邪正。招徠人材。鼓作士氣。愛惜民力。順導。

衆心爲先。數者旣備。則士奮於朝。農安於野。穀粟充
盈。財用不匱。將帥輯睦。士卒樂戰。用兵其有不勝者
哉。方今黠虜雖強。不仁不義。專務變詐。暴虐以脅制
天下。神怒人憤。莫之與親。自古豈有如此而能久立
國者。正如隆冬。固陰。沍寒。層冰。千里。陽和旣回。應時
消釋。此理之必至。無足恠也。昔者范蠡說越王勾踐
以持盈者與天定。傾者與人節。事者與地。勾踐用之
國以富強。然又必以人事與天時相參。然後乃能成
功。遂以報吳。臣竊觀國家去歲諸路豐穰。今春雨暘
調適。又將豐歲。是在我者得天時矣。正當修人事以

應之。以我之無釁。待彼之有釁。則戡亂定功。後不再
籍。夫何難之有。臣以固陋。自靖康以來。與聞國論。獨
持戰守之策。不敢以和議爲然。今十有二年矣。孤危
寡與。屢遭謗誣。仰賴聖明。曲加照察。脫身九死之濱。
今得承乏。待罪方面。恭聞戎輅。臨駐江干。將大有爲
以成戡定之烈。欣幸之情。倍萬常品。顧雖衰病。尚庶
幾未填溝壑。獲觀陛下恢復中原。攄憤千古。志願畢
矣。

通篇欲高宗以立志爲先。末段欲觀高宗恢復
復中原舒憤千古。以自畢其戰守之志。願意
在筆先。故不覺文情之周匝也。
自建炎至此十一年。始有中興氣象。帝亦謂

十餘年訓練士卒今始可用公乃汲汲以明是非別邪正招徠人材鼓作士氣爲言未幾而秦檜得政專主和議政事不修賞刑不信而宋遂厭厭人役矣噫公何見之之早也

論舉直言極諫之士劄子

臣伏觀二月九日手詔以太陽有異氛氣四合令中外侍從之臣遵前後詔書各舉能直言極諫之士一人將諏以過失次第施行用承天意有以見陛下克謹天戒思聞讜言銷弭變故以助中興之運甚盛德也臣竊考西漢舉賢良文學之士詳延于庭如董仲舒公孫弘晁錯之徒不過對策一篇指明時政得失至本朝設賢良方正能直言極諫科始有進卷及試

六論、乃對廷策、其六論題、雜出於經子史注疏之間、
所以求卓識洽聞之士、號爲制科、其得人如富弼、張
方平、夏竦、皆致宰輔、其次如錢易、錢明逸、孔文仲、武
仲、蘇軾、蘇轍、兄弟之流、皆爲名士、論議有補於國家、
然制科之舉、貫穿古今、汪洋浩渺、非強記博識、積以
歲時、未易能究其業、所以朝廷近年復置此科、未有
應令者、無足恠也、今者陛下以天變之故、詔中外侍
從之臣、遵前後詔書、各舉能直言極諫之士、臣深慮
有司拘以進卷六論、牽制舉者、難於得人、無以仰副
陛下咨訪闕失、寅畏天戒之意、臣愚欲望聖慈、特降

睿旨、將今來所舉直言極諫之士、與免進卷六論、祇令對策于廷、仍於制策內、許其展盡無隱、庶幾直言嘉謨、得以上聞、其進卷六論、自以待應科目之士、天下不勝幸甚、取進止、

乞不必遠召將帥劄子

臣伏覩陛下駕御將帥、恩禮兼隆、至有不遠千里、召赴行闕者、燕射錫賚、賜與優渥、此誠足以得其心而用其力也。將帥荷眷遇之厚、爭先望天光而聆玉音、竭蹶造朝、惟恐居後、此亦臣子之至情。然臣聞古之善爲將帥者、非有大事、不去屯所、文帝欲勞棘門、灞

上細柳之軍。則親臨之。凡以三軍之命。係於主帥。機事之來。間不容髮。使帥不在軍。敵人覘而知之。卒有警急。何以應敵。今將帥旣輕千里而入覲。又有進對燕犒之留連。邊境有虞。誠不可不慮。伏望聖慈。留神深念。自今非有大謀議。不必遠召將帥。如有獎賜之恩。遣近臣卽其軍中可也。庶幾將帥得以畢精盡慮。爲陛下敵愾禦侮。以圖恢復。將來武功告成。中國又安之後。念功賞勞。出於曲賜。朝夕進見。體貌有加。鍾鼓不作。則遣使以訪之。惟陛下所幸耳。愚慮所及。冒昧以聞。死有餘罪。惟陛下裁察。取進止。

乞屯兵江州防秋奏狀

臣竊聞思患預防、與事來輒應者、利害相去甚遠、平時不思爲預防之計、及事至而應、豈不誤國家大計耶、目今僞齊之兵、爲劉光世擊敗於淮淝之上、其餘破亾殘黨、散走嘯聚、往來於淮西之間、蘄黃兩州、旣有岳飛等軍屯駐鄂渚、分布策應、照得蘄黃兩州、與江州實爲對境、蘄黃卽江州之脅背、江州卽江西之咽喉也。萬一敗亾之卒、批亢擣虛、延入內地、使不預爲之計、臨時緩急、調發於他郡、則受敵之際、旁需救援、豈不誤事。况蘄黃等州、與江州煙火相望、通淮之

路大小十數。馬行不過三四日。步軍不過七八日。便抵江面。若無屯駐軍馬。防托要害。受敵必速。他郡救援。非月餘不至。何益於事。臣竊謂淮西之舒蘄。與淮東之通泰。事頗相類。京口無兵。則無以護通泰。九江無兵。則無以援舒蘄。舒蘄不守。則江西受敵矣。臣已依指揮。將江西等州兵將。許臣勾抽。照得江西盜賊已漸寧息。將逐州所屯駐兵。勾抽一半。起發分布控扼。所有一半。仍舊屯駐。討捕盜賊。未盡之處。其隸將兵。雖例前去差撥。竊慮逐州占吝。不爲發遣。兼蒙朝廷差到李貴步諒人兵。皆在虔州。措置盜賊。相去寫

遠緩急難以勾抽。沿江一帶險要去處。並無人兵。分布防守。況車駕駐蹕建康。如江州等處。最爲上流重地。又與去年防秋事體不同。理宜分屯大兵。以爲控守。朝廷必已行下措置。本司並不曾被受指揮。伏望聖慈。特降睿旨。早賜詳酌施行。

京口無兵則無以護通泰九江無兵則無以援舒蘄是扼要語

李又玄評

乞益修政事劄子

臣聞和氣致祥、乖氣致沴、天人之際、應若影響、不可誣也。政令和平、合於民心、天應以福、雨暘時若、而爲豐歲、此和氣致祥之效也。政令乖戾、拂於民心、天應

以災水旱極備而爲凶年此乖氣致沴之符也豐凶之本乃在人主心術朝廷注措之間宗社安危生靈休戚繫焉可不懼乎前年江湖閩浙嘗苦大旱流離失業殍踣相望陛下軫念之深不遑暇食親洒宸翰勸誘賑濟其所全活不知其幾千萬人至誠動天報以休應曰雨而雨曰暘而暘歲大豐穰民以安樂自經一稔之後上下恬嬉不復勤恤民隱朝廷意民間之有蓄積白色誅求上供不以實數而以虛額和糴不以本錢而以閑子絲蠶未生已督供輸禾穀未秀已催裝發州縣困於轉輸文移急於星火官吏愁歎

閭里怨咨。感動天心。旱災復作。江湖淮浙。所被甚廣。歲且艱食。人情驚疑。如居風濤。洶洶靡定。然則陛下欲消弭災異。導迎吉祥。不必他求。但如前日之用心。自然感召和氣。休應立臻。則旱暵必復爲豐年矣。昔周宣遇災而懼。側身修行。欲銷去之。而王化復行。雲漢之詩是也。安知旱暵之災。不爲中興之資乎。願詔朝廷。益修政事。凡所以賑救民災。給足軍食者。早整素備。無待倉猝。取具臨時。方今強虜憑陵。僭竊窺伺。屯兵淮潁。以爲控扼。欲進則未能。欲退則不可。開口待哺於縣官者數十萬人。平時運餉。已極勞費。歲一

不稔。將何以給之。夫今日之患。欲民力寬。則軍食闕矣。欲軍儲裕。則民財匱矣。二者如鐵炭低昂。此首重則彼尾輕。非有術以權之。使歛不及民。而軍食足。不可得而均也。孟子曰。無政事。則財用不足。今屯兵之數。不多於前時。而養兵之費。十倍於往日。死生來去。無籍可稽。上功行賞。無實可考。轉資遷秩者。動以萬計。廩祿之費。又不知其幾何也。開端者不可復歛。放行者不可復收。日益月加。無時而已。天地之生財有時。人力之理財有限。而度量不立於其間。養兵之費。有增無減。坐致耗屈。竭出於民。謂之有政事可乎。此

臣之所以日夜爲陛下寒心者也。夫政事立。然後財用足。財用足。然後軍食給。軍食給。然後民力寬。民力寬。然後天心格。天心格。然後和氣可召。而爲豐年。此臣所以願陛下救今日之弊。以修政事爲先也。臣仰察天時。俯揆人事。今日誠爲危急存亡之秋。惟陛下念宗社生靈之重。圖爲善後長久之策。留神邦本。天下幸甚。臣以衰病。屢乞閑散。將歸山林。不勝憂國之情。輒復自竭。陳其大畧。以瀆天聽。如聖心尚有所疑。願賜清問。得以展盡底蘊。爲陛下詳言之。誓罄狂瞽。

仰酬大恩。

